

INUIT ATAQATIGIIT

Inatsisartuni



UPA 2019/25

28.03.2019

Mimi Karlsen

**Inatsisartut aalajangiiffigisassaattut siunnersuut Namminersorlutik
Oqartussat ilalissagaat piginneqqaartussaatitaaneq pillugu inatsisip
Kalaallit Nunaanni atortuulersinnejarnissaa Kunngip peqqussutaatigut.**

(Ilinniartitaanermut, Kultureqarnermut, Ilageeqarnermut Nunanullu
Allanut Naalakkersuisoq)

Inuit Ataqatigiit qujassutigivarput Naalakkersuisut piginneqqaartussaatitaaneq
pillugu inatsisip Kalaallit Nunatsinni atortuulersinnejarnissaa saqqummiuummassuk.
Inuaat ikittunnguugatta eqqumiitsuliortortatta suliaannik pisisinnaasut ikittunnguusarput,
taammaammallu eqqumiitsuliornermik inuussuteqarniarneq ajornakusoortuuvoq.
Eqqumiitsuliortortatta timikkut tarnikkullu immersortuartaraatigut, taava uagut
isumagisussaagaluarparput eqqumiitsuliortortatta pitsasumik atugaqarnissaat. Ingammik
ukiuni makkunani internetsikkut suna tamaat pissarsiarisinnaanerani eqqumiitsuliortortatta
piginnituunerat mianerisassaraarput, illorsorlugulu.

Atuakkiortortatta atuakkanik atorniarfinni atuagaataat attartoraangatsigit akeqanngitsumik
atortarpagut, qujanartumillu suliniutigineqarneratigut akissarsisalernikuupput, taamatuttaaq
nipilsortartut allallu. Nunatinntut inatsisikkut atortuulersinnejarsimagaluartoq aamma danskit
nunarsuarmiut piginneqqaartussaatitaanermut inatsisiliorneranni arlaqartunik
allanguuteqartitsisoqartarsimavoq.

Tassa ullutsinni teknikkikket, internetsikkut periarfissat arlaqartigisut aatsaat iluamik
piginneqqaartussaanermik illersuinissaq pingaruteqartigilerpoq. Saqqummiussamilu
allanguutit Kalaallit Nunaanni ullutsinnut naleqqunnerusunik nutaliaanerusunik
tulluarnerusunillu inatsisiliornermik kinguneqarsinnaammata iluaraarput.
Tassami pitsaanerpaanik kalaallit eqqumiitsuliortut piginnittussaatitaanerannut
iliuuseqartoqarniarpoq.